

Erntedank

Die Äppel un die Beere
sinn ab, die Bääm sinn leer.
Die Kürbisse, die dicke,
sinn reif un arisch schwer.

Wo's Korn war, sinn jetzt Stopple,
die Frucht is unnerm Dach.
Die Häsjer duhn jetzt hopple,
wo Grumbeer ausgemach.

Die Traube in de Kelter,
wärrn ausgepresst un dann
zu Wei, an dem die Winzer
e großi Frääd ball hann.

Die Scheier is bis owwe
voll mit Hei un Stroh.
De Bauer is zufriede,
die Bauersfraa is froh.

So hat de Herbscht a diesjohr
uns widder reich bedacht.
Mer danken unser'm Schöpfer,
weil der das so schää macht.

